



# The Aklaklongdi Express

Liangmais' Daily Newspaper

"Majibo niu ngamne"

Luan 131<sup>st</sup> bo Durand cup final mathenbo ga Mumbai City FC tu Bengaluru FC niu goal 2-1 ga ngamkhai jiu 2022 Durand Cup hai Bengaluru niu Champions lumide.

England kadingu chawangpui Elizabeth II tu ndanai Westminster Abbey London ga kasaipum kabaibo tienhai tienkhai mide, siga India gu President Droupadi Murmu di tadjiu padam lu macham khaimide.



*Nangniu damkhaibo jat hinaniu wangjiu nakhuga makhum kiune. Tathoilui 86:9.*

**Masui makmai leng Chahiu ga 500 piraye. CM.N.Biren**

### Imphal Free Press.

**Ngen.19.**Tadmibo nidkak Nidwannai Manipur Chief Minister N.Biren Singh niu State ga soukum ,mai masui makmai (Persons with Disabilities of 60 to 80 per cent) dungleng chahiu ga rangkang 500(Kai mangiu) hai Chagahiu gasu suju pihou miraye chiuju India gu Prime Minister Narendra Modi gu luan 72 gu manaka (Birthday) nai senpat mide.

Sikhai suiye, tadmibo takum Chakehiu 2017 kumga " Chief Minister gi Sotharabasingi Tengbang" gu scheme hang gasu masui makmai 80 per cent rilam bammai leng chahiu ga 1500 (Sangkhat kai mangiu) di pijiu bam bowe.haikumbo scheme si aliudi lutou kasuimai maksai lubui siakmai kengbam me chiudi majang kamkhai ra mai hajeng niu maksai pathak palam smak jeng niu lutou makjiu chariu bammai keng bam phui ye sinu aliu wangjeng ga lutou kasu mai kasi mai bamsai pajai palam kasi mainiu majang takiu khai bikhe.

Haibo hiu lung ga soukum mai tacham pisikhai nimai maksai advertisement mali gu bidi maksai phom/baudi gu bidi paman lumakjiu published thiukhai bine. Sinu Pahang ga khaibambo phone No. ga alam wang khai suiye.

### NSCN (IM) nai Centre chalad npousu lan misune

**Dimapur.Ngen.19.**Nagalan d United Democratic Alliance Chairman T.R .Zeliang niu dinbo kumsai NSCN (IM) nai Centre Naga peace talk kamlanra suikhai mide chiuju dinne.NSCN (IM) gu jupou dung Mennai chalet kaphen ra jengniu Delhi lam tadsune chiuju dinne.

Nagaland State Government's Core Committee on the Naga Political Issue dungnai NSCN(IM) gu jupou dung tadmibo nidkak Nidwannai Chamukedima ga wanchak nia kumbo makham aruang khai mide chiuju diine.

Sikhai suiye, tadmibo nidkak khat suang ga Nagaland gu MLA dung Naga Peace Talk Core Committee Chairman Neiphu Rio niu majang luju Centre gu papi para thiumai dungtu Naga gu ladlui hai majatjiu loikhaira npou tadbo we.Sigasu central leaders' dung niudi paliutu Naga gu jupou dungtu kawibo jaiga chalad madin thiulu jiu naga gu ladbam hai majatbo lungga loikhai ra karamra khe chiu langkhai bowe.Chiudi NSCN (IM) gu machunra masan siakjiu Naga gu Flag Nai Constitution hai tam maksai kaloibo thi silakge chiu masan siak mibo we

### Minister Awangbow pakang maitu majang luju Kangpokpi Singiu ajantad khai mide.



(Photo: IFP)

**Imphal.Ngen. 20.**Manipur Water Resource and Relief Minister Munhu Awangbow Newmai niu Kangpokpi gasu Koirengai kakga luangbambo singgiu khatdi pawangjeng hai phuitad khai mide. Singgiu khetga soukummai pagu kadi charam masan makjiu paliu khenrang ahi nguju bammai tudi kam masan miraye chiuju dinsan khaimide.Pagu para thiubo pulton hai original application 673/2018 of Green Tribunal lamga ye chiuju tacham ga dinne.papuitad ga Kangpokpi ward no.1,2,15, khatdi 16 ga ajantangjiu singgiu kiga tareng taliang khaibo sinu singgiu tu kam Tania khaibam bowe sinu sikumbo tu phuirea jengniumatbo lungga committee macha khaine chiuuu dinkhai mide.

### Amarinder Singh BJP ga ngut mide

**New Delhi, Ngen.19.** Masuang Punjab Chief Minister thiukhai mibo piu Captain Amarinder Singh haidi BJP ga ngut khai mide chiuju tacham ga dinne.Pagu party Punjab Lok Congress maidungdi jouju ngut tajut khai mide. Paliutu lukhaibo tienhai Senior BJP leaders khatdi Union Minister Narendra Singh Tomar khatdi Kiren Rijiju jouju New Delhi ga kamkhai mide. Sibolukhaibo ngamkamga masuang Lok Sabha gu MP thiukhaibo Amrik Singh -



Aliwal khatdi masuang Punjab Assembly Speaker thiukhaibo Ajaib Singh Bhatti di kouwe chiuuu dinne.

### Tamenglong ga raithubo Rehabilitation Centre lekhai mide.

**Tamenglong, Ngen. 19.** Raithubo thiujui Tamenglong H.Q. ga NGO niu phui macha rabo " Life Saver Trust " chiubo rehabilitation centre khat ndanai niu lepat khaimide chiuju tacham ga dinne. Haibo centre lepatbo ngam kamboga project director Titus Gangmai niu dinju, haibo rehabilitation centre hai Christian chengriak gu luiju couselling hai kamkiu raye sinu haibo wanjeng ga bambo Churches gu pastors

Dungdi wangjiu kakheng thiunkha khaira chiuju jiu pagu tacham ga dinne.Haibo rehabilitation centre lepat bohai "The Lightning Drugs and Alcohol Drugs De-addiction and rehabilitation Centre" chiubo banner hang gasu lepat khaibo we.

Haibo Duigailong ga bambo rehabilitation centre hai Duigailong Baptist Church gu pastor Dr. Dimonang niu katpatbo ngam kamkhai mide.

### Karingting Lunlung



Hail! Papui, aliu Liangmai gu paper patlan bamhe, naliu maiki khon ken sigu marai sinu pi mathak lan makra bill I khalon khawangdi pi mawi pikhai siakra kamnoh.

*"Chabinpui kathengdi phiken khat gasu suwe."*

### Editorial

Kadiah pawan sai suiuiu wahinang kali wangjiu bamme.disu mibo chakenga aliu jat hai ndechiu jiu lungbamlo chiujiu aliu ronnang aliutu maniu kasuibo wan mide.Aliu wanjeng awajiu phuikhai boga,mathiusi maningtou bamsune,npui kapha,tadui chami,nkan mariu,khatdi aliu kalungbo lunlung.Makumkhe,donsukhe, machakhe, aliu kadiah tuhai maidi macha khaison bilakge aliu makjiu.Pawan riju makga mathiu tatién maran lukhe.

### Mathen Cham



**TME.Tamei, Ngen 20:** Luan 27<sup>th</sup> Liangmai Sports Meet (LSA) hai mahkum Jengtung 10<sup>th</sup>-26<sup>th</sup> Chabamhiu 2023 Oklong Nguang namga khai sune.Haibo mathen gahai Npiumai gudi Npiumai gudi mathen aliatbo pachat pachat tamtam jiu mathen kiusune chiujiu organizing committee gu tacham ga dinne.Mathen rabo pachatdung nisuai Npiumai/Npiumai

- i. Football
- ii. Volleyball
- iii. Badminton
- iv. High Jump
- v. Longjump
- vi. Shotput
- vii. Running Race(100)

Haisi LSA ga mathen rabo pachat dungne.

### JADONANG TROPHY

Zeliangrong Football Association niu organize thiubo Luan 13<sup>th</sup> Jadonang Memorial Football Tournament 2022 ga aliu Liangmai gu team Tamei Youth Club di jou sune chiujiu tachamga dinne



### Thonkiubo Cham

The Makuilongdi Express lamsu aliu niu chakhuang thiujiu bambo Munhu Ch. Parangkambou care taker C.A.O Makuilongdi Region GPRN khatdi Munhu Liangthon Pamai Dy.Kilonser GPRN panai niu The Makuilongdi Express hai tadkiu hou lanra lepatbo ngamhai takiu khaibi ye khatdi panaigu kalendi dijiu pikhaibi ye.Siron nang makjiu Mr.Masiabui Finance Deacon Chiang Baptist Church niu di changam thinsu ra jengniu Rapiu ga kadkhaibo ngam hai kamkhai bibo jengniu Paliu mathiutu thonkiubo cham hai popat khaiye. paliu gu ngamkam hinang ga Tingwang niu thoikhaibo thiulo.

### Sikhai lanbo

Mathiu khuga kahum jiu khengkhaibo. "The Makuilongdi Express" hai 2015 lamsu lingsujiu 2017 katang kamkhai lujiu pakak khat mathak khaiye. Aliu niu tensi makdi pakak khat changam kamkhai boga malimaidi organization tamtambo niudi kengjiu nkhakhai biji pawan pakak khatnadi changam kamkhai lubo jengniu mathiutu thonkiubo cham poupat khaiye. Aliuniu niu mathak nijiu mathakbodi makge,chiudi sibo wangara network di wachiumak khatdi npui kapha electric etc.tamtambo problem niu changam kamwang tanglakbo kengjiu bamjiu mathak khaiye. Chiudi thaimenra nthen majen suang kapoina wibi bamme.Siniu mathiuniu suikhai jiu co-operation pikhai lansai changam hai mathiu chunning tentang lulak bamdi tenlanra chiujiu marang bamme.Tadmibo wan gara Nidkak khatga paluot sum thiujiu patbo we chiudi thainai mienra naimachang (Except Sunday) patra marang bamme.Aliu khuga mania mali malanjuiu bam makbo jengniu khatdi pawan pawanga npui-kapha, light gu problem bambo wanga kempat lumakdi mathiu khengkhai raira mide. Chiudi mathiuniu cooperation pikhai jiu subscribe thiukhai sai padon padon thiujiu tien mawi khangne. Aliu Liangmai mathiu juwe tiubo maning khaijiu chalung sajiu subscribe thiukhai khera kahumjiu khengkhai ye,thonkiude.

### "CM Da Haisi" Chiubo web portal hai launched thiukhai mide

**Imphal, Ngen.19:** Manipur Chief Minister N Biren niu Mennai 'CM Da Haisi' chiubo web portal pagu office gasu lepat bon gam hai takiu khai mide.Haibo web portal lekhaibo hai parathiu jiu maidiu maida mainiu paliu gu kachariubo govt. khu pouting lura khatdi tuhoi aliu kadihga corruption tanjiu bamboo tuhai phungpat ngamra jengniu pabam kachabo mathiu leng lekhaibo we chiujiu paniu dinne. Maikhat niu tamtambo corruption kambambo nangniu sisai maksai suini makbo bamsai haibo [www.cmdahaisi.mn.gov.in](http://www.cmdahaisi.mn.gov.in) gu web portal ga logging kamlujiu complaint thiukhaibo suiye. Siron nang makjiu nangniu complaint thiukhai mibosi tadkiu mah tadkiu maklo chiubo di sibo web ga ngut jiu phui kadaibo suiye chiujiu dinne.

Haibo CM Da Haisi web portal lepatbo ngamkam ga paniu tacham dinjiu aliu kadihga para thiujiu corruption jengniu disu thengsu silakjiu bamboo we siniu corruption tu kam mahara haisi pabam pakhai khatdi pajat kachabo we chiujiu paniu dinne. Maning tou khai suiye chiubora tadmibo Kanahhiu jengtung 23 2022 nai Chief Minister gu office ga Anti-Corruption Cell office hai pajan mathak kali lanjiu Public Grievance Redressal and Anti-Corruption Cell chiujiu lepat khai mibo we.Paniu dinjiu, tuhoi katang gu thiujiu Public Grievance Redressal and Anti-Corruption Cell ga complaint 134 hai wangtang nge chiujiu padam 100 ga 85 kumbo ra kam tathui khai mide khatdi complaint kam wang mai tui npou tou tang khai mide chiujiu dinne.

### Khengkhaibo

Tacham hai maiki lad gasu chalibo jengniu mathiu chunning ga chali tangmak bamsui ye chiudi mathiu niu khatkhat gu kasonbo tu sikhai khera mathiu khuga khengkhai howe.